

**Amerikamiut Thule Air Base-imik atuinerannut atatillugu, nunatsinnut aningaasanik amerlanerusunik isertitsissutigineqarsinnaanera anguniarlugu misissuisitsinissamik naalakkersuisut danskit naalagaaffiannut saaffiginnissuteqaqqullugit inatsisartut aalajangiiffisassaattut siunnersuut**  
*(Knud Fleischer, Kattusseqatigiit Partiit)*

**pillugu**

**Nunanut Allanut Sillimaniarnermullu Ataatsimiititaliap**

**ISUMALIUTISSIISUTAA**

**Siunnersuutip aappassaaneerpeqarneranut saqqummiunneqartooq**

Ataatsimiititaliap suliarinninnermini ilaasortarai:

Inatsisartunut ilaasortaq Justus Hansen, Demokraatit, siulittaasoq  
Inatsisartunut ilaasortaq Jane Petersen, Inuit Ataqtigiit, siulittaasup tullia  
Inatsisartunut ilaasortaq Hans Aronsen, Inuit Ataqtigiit  
Inatsisartunut ilaasortaq Aleqa Hammond, Siumut  
Inatsisartunut ilaasortaq Kim Kielsen, Siumut  
Inatsisartunut ilaasortaq Per Berthelsen, Siumut (Kim Kielsenimut sinniisoq)

Siunnersuut ulloq 13. oktober 2010 siullermeerneqareemat ataatsimiititaliap sukumiinerusumik misissuataarsimavaa.

**Siunnersuutip imarisaa siunertaalu**

Siunnersuutip siunertaraa Naalakkersuisut danskit naalakkersuisuinut saaffiginnissuteqassasut Pituffimmi Thule Air Base-imik amerikamiut atuinerannik nunatta qanoq iluaqutissarsinerusinnaaneranik qulaajaaviusussamik misissuisitsinissaq siunertaralugu. Siunnersuummut tunngavilersuutini erseqqinnerusumik oqaatigineqarpoq Pituffimmik eqqaanillu amerikarmiut atuinerannik akiliuteqartitsinnaanermik piumasaqarsinnaanitsinnut periarfissat Naalakkersuisut misissussagaat, tassami massakkumut Pituffimmi / Thule Air Base-imi eqqagassat saqqumiinnartut assaatallu salinneqarnissaat iluatsissimangimmat. Eqqakkat naatsorsuutigineqarput tamaani avatangiisinik innarliisimassasut.

**Siunnersuutip Inatsisartuni siullermeerneqarnera**

Naalakkersuisut akissuteqaataanni oqaatigineqarpoq Dundasip utertinneqarnera pillugu isumaqatigiisummi 2003-mi februaarimeersumi amerikamiut utertitsinnginnermi avatangiisinik saliinissaannik pisussaaffilernissaat ajornarsimasooq. Eqqaavissuarni il.il. mingutsitsineq inuit peqqissusiannut ulorianartutut nalilerneqarpat aatsaat amerikamiut saliumasimapput, taamatulli nalilerneqarsimanatik. Tamatumunnga taarsiullugu danskit naalagaaffiata avatangiisinik saliinissaq

isumagissallugu pisussaaffittut tigusimavaa. Saliinissamut tamatumunnga piumasaaqatit Nunamut Namminermt, Avatangiisinut Pinngortitamullu Naalackersuisoqarfiup aamma danskit avatangiisinut tunngasunut aqutsisoqarfiata Miljøstyrelsen akornanni eqqartorneqartarsimapput. Tamanna pillugu 2011-p naannginnerani isumaqatigiissuteqarnissaq naatsorsuutigineqarpoq.

Isumaqatigiissutip nunatsinnut pissarsissutaanerunissaa siunertaralugu amerikarmiut Pituffimmi Thule Air Base-imik atuinerannik misissuinissamik siunnersuutigineqartumik aallartitsinissaq siunertaralugu danskit naalackersuisunik oqaloqateqarnerunissaq Naalackersuisut ammaffigaat.

Isumaqatigiissutip nunatsinnit pissarsissutaanerunissaa siunertaralugu periarfissat misissorneqartariaqarnerannik partiit oqaaseqartuisa amerlanerit siunnersuuteqartoq isumaqatigaat. Minnerunngitsumik arlalinnit Igalikumi isumaqatigiissut/ataatsimut ataatsimiititaliami Joint Committeemi suleqatigiinneq Naalackersuisut isumaqatigiinniutigeqqinniagaat tikkuarneqarpoq. Partiit arlallit oqaatigaat isumaqatigiissutip ilinniartitaanermut tunngasortaa pitsaanerulersinneqarsinnaasoq, minnerunngitsumillu timitalerneqarnerusariaqartoq innuttaasunut maannakkornit annertunerusumik paasisitsiniutigineqarneratigut. Partiit oqaaseqartuisa amerlanerit siunnersuutip qiterisaa tikkuarpaat – tassalu Pituffimmi Thule Air Base-imi amerikarmiut sakkutooqarfeqarnerisa avatangiisitigut peqqissutsikkullu kingunerisai annerusumik pingaartinneqartariaqartut. Oqaaseqartut arlallit ilanngullugu oqaatigaat silap pissusaata allanngornera pissutigalugu Canada avannaqqullugu imaatigut aqutit nutaat aamma ilanngullugit isiginiarneqartariaqartut, tamatumanimi ajutoortoqarsinnaaneranut annertunerusumik upalungaarsimasoqalernissaa naatsorsuutigineqartariaqarmat.

### **Ataatsimiititaliap siunnersuummik suliarinninnera**

Siullermik ataatsimiititaliap UKA11-mi siunnersuut pineqartoq immikkoortoq 69-tut siullermeerneqarnerata kingorna suliarineqarani, siulittaasoqarfiimut UPA11-mut kinguartinneqarnissaa qinnuteqaatigaa. Ataatsimiititaliap ilanngullugu aalajangiuppaa Eqqissimatitsinermut Avatangiisinullu Ataatsimiititaliap siunnersuut pillugu isumasioqatigalugu ataatsimeeqatigineqassasoq. Tamannalu ingerlanneqarpoq UPA11-p ingerlanneqarnerani. Ataatsimeeqatigiinnermi aalajangiunneqarpoq siunnersuummi taasissutigineqartussa q siunertaatalu imarisaa imminnut ataqatigiinnginnerat pissutigalugu, Naalackersuisut pingasut tassaasut, Naalackersuisut Siulittaasuat, Nunamut Namminermt, Pinngortitamut, Avatangiisinullu Naalackersuisoq aammalu Peqqissutsimut Naalackersuisoq isumasioqarnerunissaannut Ataatsimiititaliamit aggersarneqartariaqartut.

Naalackersuisunik isumasioqatigiinnermi siunnersuutigineqartumut aammalu siunnersuutip siunertaanut apeqqutit akeqquneqarput.

Ataatsimut eqikkarlugit nalilissaagaani Naalackersuisut akissuteqaataat aallaavigalugu maannamut Naalackersuisuni suliniutigineqartut suliallu ingerlareersut tassaapput:

1. Naalackersuisut Thulep eqqaani Dundasimi Amerikarmiut eqqagaat pillugit saliinissamut aningaasaliissutissat pillugit qallunaat naalackersuisuinut isumaqatiginninnerat suli

naammassineqanngilaq. Naalakkersuisooqatigiit isumaqarput qallunaat naalaakkersuisuisa Dundasimut eqqakkanik saliinissaannut aningaasaliissutaat annikippallaartut taamaamat annertusineqarnissaannik piumasaqaat sulii qallunaat naalakkersuisuiniit tusaaniarneqarsimanginnera, saliinissamat sulissutiginninnerup maannamat sulii aallartissimanginneranut pissutaasoq.

2. Qaanaami inuit peqqissusaannut misissuinerit inernerit aatsaat august 2011 piareertussaapput.
3. Pituffimmi amerikarmiut aningaasaliissutigisartagaasa ukiuni aggersuni sipaarniarfigineqarnerat eqqarsaatigalugu aningaasatigut annertunerusumik pissarsiffiginissaat ajornakuusaaq. Taamaattorli Naalakkersuisut Amerikarmiunut isumaqatigiissutaat aallaavigalugu Joint Commiteep juni 2011-mi ataatsimiinnissaani nutarterneqarluni isumaqatigiinniutigineqartussami, kalaallit ilinniagaqartut amerlinissaasa ilisimatusarnermullu tunngassuteqartunik annertusaanissap piumasaqaatigineqarsinnaanerit Naalakkersuisunik ammaffigineqarpoq.

Taasissutigineqartussap siunnersuutillu siunertatut imai imminnut ataqatigiinnginneri tunngavigalugu ataatsimiititaliap isumaqatigiissup inassuteqaatigaa aalajangiiffigisassatut siunnersuut itigartitsissutigineqassasoq. Taassuma saniatigut ataatsimiititaliap kaammattuutigaa Dundasimi eqqakkanik saliinissamat aningaasanik amerlanerusunik immikkoortitsinissamik qallunaat naalakkersuisuinut piumasaqaat Naalakkersuisut aalajangiusimaannassagaat.

Ataatsimiititaliap aammattaaq siunnersuuteqartoq kaammattorniarpaa aalajangiiffigisassatut siunnersuutip immaqa UKA11-imi suliarineqarnissaa qinnuteqaatigeqqissagaa, tassani pisut pillugit paasisutissat pissutsillu qulaani taaneqartut pillugit ilisimasat Naalakkersuisut qulaani oqarnerat malillugu pissarsiarineqarsinnaalersimassallutik.

### **Inassuteqaat**

Qulaani taakkartukkagut pillugit ataatsimiititaliamit oqaatigerusupparput Naalakkersuisut kajumissaaratsigit Thule Air Basep nunatsinnut annertunerusumik iluaqutaasumik atugaalernissaanut danskit naalakkersuisuinut saaffiginnissuteqarnissaat. Oqaatigerusupparpullu Dundasimi eqqakkanut saliinissamat nunatta danskillui oqartussaaffiata isumatatigiinnniarnerat ingerlatiinnarneqassasoq. Naalakkersuisullu kaammattorpagut eqqakkanik saliinissap piaartumik pinissaa siunertaralugu suliaqassasut. Ataatsimiititaliamillu Naalakkersuisunut kajumissaarutigalugu eqqaarusupparput sorsunnersuup aappata kingorna amerikarmiut eqqakkatut qimataat nunatsinniittut salinneqarnissaat suliniarfigineqarluni aallartinneqassasoq.

Qaanaami inuit peqqissusaanni misissuinerup inernerisa takutissappassuk inuit piffinnit allanik peqqinnginnerusut tamannalu Thule Air Basemik atuisoqarnera patsisaaqataasinnaatinneqarpat, taava Naalakkersuisut kajumissaarpagut kinguneqartitsisumik tassungarpiaq tunngasumik suliaqalissasut.

**Ataatsimiititaliap isumaqatigiissup siunnersuutip itigartitsissutigineqarnissaa inassutigaa.**

31. marts 2011

**UPA2011/24**  
(UKA2010/69)

Taamatut oqaaseqarluni isumaliutissiisummilu oqaatigineqartut paasinnilluni ataatsimiititaliap siunnersuut aappasaaniigassanngortippaa.

Justus Hansen,  
Siulittaasoq

Jane Petersen,

Hans Aronsen

Aleqa Hammond

Kim Kielsen